

四庫全書

集部

# 欽定四庫全書

集部

御定歷代題畫詩類卷一百十八至  
二十

詳校官刑部侍郎<sub>臣</sub>李封

主事銜<sub>臣</sub>徐以坤覆勘

總校官降調編修<sub>臣</sub>倉聖脉

校對官中書<sub>臣</sub>高 中

謄錄監生<sub>臣</sub>賀松齡

欽定四庫全書

御定歷代題畫詩類卷一百十八目錄

人事類

生日劉景文以古畫松鶴為壽且貺佳篇次韻為

謝

宋蘓軾

劉訥畫廬陵三壽圖求詩

宋周必大

詹仲信以山水二軸為壽圖辭不可乃各作一絕

句謝之

宋陸游

題宋徽宗獻壽桃核圖 元柳貫

題南山獻壽圖 明李暕

望雲祝壽圖 明丘濬

題萱草圖為從母孺人六十壽 明吳寬

三姊壽七十以八月十三日生因題月兔圖奉賀

明吳寬

梅竹壽意圖 明程敏政

題榮壽圖 明傅珪

仙窟圖壽白都憲母 明周用二首

代題壽父母圖 明屠僑

題崆峒圖壽祝永明 明鄭鵬

丹陽尹來非泉索題南峰圖為乃翁壽 明廖道南

恩榮雙壽圖為吳峰陳侍御賦 明廖道南

題雪巖圖壽麗卿乃翁 明廖道南

題彭宣慰壽圖 明廖道南

壽申封君歌題青鳥圖 明王世貞

題孟里圖壽尤母

明王世貞

題畫壽大參暘谷先生七十

明王世貞

為林子騰茂才題桃源圖壽

明王世貞

題靈椿圖壽卓徵甫光祿五十

明王世貞

題柏舟畫卷贈高母

明王世貞

為范母題晚節寒香卷

明王世貞

題張步兵懷椿壽萱卷

明黃相

題黃山煙樹圖為邵果齋內人壽

明焦竑

題李公子喬松圖稱壽尊君臨淮侯明焦竑

題仙桃白鹿圖壽蔣參岳子徵明張鳳翼

題扇壽愛蔬吳先生尊人明顧清

賦蟠桃圖為張時震父母壽明顧清

題畫松石為吳赤含壽明李日華

題竹溪圖壽竹溪老人明李維禎

題九如圖為高觀察四十壽明董其昌

題百萱圖壽李本寧母太夫人明董其昌

樂壽圖為潘百朋壽 明董其昌

嘉平十四日題寫古梅壽襟海丈 明李日華

韓參議家慶圖 元袁桷

張希孟嘉慶圖 元袁桷

秦元卿家慶圖 元馬祖常

題晉寧申氏家慶圖 元程鉅夫

贈別柯伯庸歸省親柯自龍虎來臨安邀予三茅

山中出示方壺所作東柯谷圖及翰苑諸名公



詩一帙且曰吾垂白之母在堂將歸省焉請與

子別因賦此贈宋戴奎

題方壺子天台圖送曹士安省親還上清元丁復

題劉山長雪夜板輿圖元薩都拉

題胡伯衡飛雲圖元楊載

家山飛雲圖元程鉅夫

題潘叔寬望雲圖元貢師泰

望雲思親圖為王大使作元丁鶴年

題張伯源夢父還家圖 元張庸

題陳象之與母避寇圖 元張庸

瞻雲圖 明廖道南

李氏奉親圖 元程鉅夫

題白華圖為本齋王公 元王壽衍

題白華圖為本齋王公 元湯彌昌

題白華圖為本齋王公 元陳方

題白華圖為本齋王公 元龔璠



御定歷代題畫詩類卷一百十八目錄

欽定四庫全書

御定歷代題畫詩類卷一百十八

人事類

生日劉景文以古畫松鶴為壽且貺佳篇次韻為

謝

宋蘇軾

問予一室間寧有千里廓塵心洗長松遠意發孤鶴生  
朝得此壽死籍疑可落微言在參同妙契藏九倫故人  
有奇趣逸想寄幽壑霜枝雪寒暑雲翮無前却何須構

明堂未羨巢阿閣緬懷別時語復作數日惡詩腴固堪  
餐字瘦還可愕高標忽在眼清夢了如昨君今噲等伍  
志與湛輩各豈待相顧言方為不朽託子雲老執戟長  
孺終主爵吾當追喬松子亦鄙衛霍

劉訥畫廬陵三壽圖求詩

宋周必大

同辭宦路返鄉閭兩驕驍中間以駕前後顧瞻羞倚玉  
夫干引從偶連珠三人不用邀明月九老何妨續畫圖  
從漢二疏唐尹後相親相近此應無

詹仲信以山水二軸為壽固辭不可乃各作一絕

句謝之

宋陸游

春山

策蹇渡橋春雨餘亂山缺處草亭孤不知何許丹青手  
畫我當年入蜀圖

雪山

雪庵梅邨一徑斜茅檐煙火兩三家眼明見此幽栖地  
却恨吾廬已太奢

題宋徽宗獻壽桃核圖

元柳貫

青鳥銜書昨夜來  
蟠桃如斗核如杯  
蓬萊殿上三千壽  
不及春風夢已回

題南山獻壽圖

明李暉

將軍落筆怪且雄  
能寫嵯峨率律萬仞之奇峰  
模糊猶含太古色  
慘澹頗帶清秋容  
儼如蓬萊三山翠  
且重又如廬山五老削  
出金芙蓉  
千盤萬轉不可測  
恍忽雲氣隨飛龍  
下有樂瀉之流泉  
上有偃蹇之長松  
松根羽人



顏色好抱膝盤陀事幽討云是南極天邊之壽星遨遊  
先天後天老被以青霞裘蔭以白羽葆龜游綠沼沉滄  
波鹿放蒼厓食瑶草有鶴有鶴飛且鳴雪衣丹頂隨風  
輕兩鶴飄然入紫清一鶴獨立和以簫韶聲手拈雙青  
童載以白玉笙上朝三十六帝京五雲仙樂來相迎玉  
女投壺其聲錚錚白兔擣藥使人長生胡君欣得之喜  
氣何盈盈是時七月涼風生君來飲我黃金觥酒酣再  
拜求我歌須臾落筆雷霆轟五岳為之動三江為之傾

此圖足為仁者壽題以南山獻壽之佳名胡君胡君宜  
愛惜我歌歌罷千金值挂向高堂雪色壁夜夜虹光射  
天赤

望雲祝壽圖

明丘濬

昔賢望雲憶親舍雙目熒熒逐雲下今君望雲祝親年  
一心炯炯依雲邊舉頭見雲如見母獨立蒼茫凝睇久  
輪輪囷囷鮮且明浮光呈瑞表壽徵觸石遙從泰山出  
雨下土子滋萬物有如春暉煦草心亦似凱風吹棘針

母恩如此莫可報望雲再拜情何任情何任意無已目  
極天高萬餘里越王臺上陽生時焦子初黃蟹螯紫高  
堂綺席倚雲張紛紛兒女羅酒漿就中獨少讀書子挾  
策多年遊帝鄉帝鄉迢迢歸未得對此佳辰應惻惻馳  
心直與雲天高恨不將身在親側蒼天漠漠雲悠悠雲  
色還如親白頭孝誠一念感穹昊雲影為之凝不流何  
事良工心亦苦筆端寫出心中語紅雲朵朵捧天庭白  
雲片片迷江樹紅雲影裏望白雲白雲如舊紅雲新裁

雲作衣雨為酒共祝君親千萬壽

題萱草圖為從母張孺人六十壽明吳寬

北堂慈母坐薰風萱草當階見一叢  
莫向洛陽看舊譜此花真是壽安紅

三姊壽七十以八月十三日生因題月兔圖奉賀

明吳寬

橋頭水滿月流輝設悅高堂映彩衣  
節賀中秋今已近壽期百歲古尤稀  
門闌舊傍金獅壯圖畫新成玉兔肥

小弟相看今老矣願為煮粥正懷歸

梅竹壽意圖

明程敏政

羅浮仙人冰雪顏渭川君子青琅玕憑誰點染入毫素  
緋桃綠李空漫漫曉日高堂奉春酒燒筍蒟香祝君壽  
願梅結子竹生孫長作山中歲寒友

題榮壽圖

明傅珪

江天遙識少微星閒閱乾坤八十齡高咏直追陶栗里  
幽居還傍晉蘭亭名知郡守非干謁誼重鄉閭足典刑

何事壽筵光彩異新看雛鳳下青冥

仙窟圖壽白都憲母 二首

明周用

愛日留深景高年共物華宮箋瞻后月帔錦鬱仙霞紫  
誥頻封國籃輿且近家欲傳萱草賦堂北漫看花  
龍章五色照蠶絲大郡高銜自昔時績學郎君如父貴  
承顏新婦得姑慈瑤圖已見仙人屋玉署仍傳學士辭  
聞說中閨偕燕喜為歌南國采蘋詩

代題壽父母圖

明屠僑

聞說瑤池會事新，鬱葱佳氣北堂辰。  
青銅月滿明珠箔，白髮莖疎照錦茵。  
簫管鳳皇臺上侶，兒孫蘭蕙園中人。  
風霜亦屢疑春色，烏鵲年年渡漢津。

題崆峒圖壽祝永明

明鄭鵬

吾聞崆峒山，屹崱三萬丈。  
星辰羅層巔，雲霞罩蒼莽。  
琪樹競芬芳，石室廓弘敞。  
伊昔廣成子，於茲抱玄養。  
日月參輝光，天地同沆瀣。  
猗歟度關翁，千載契心賞。  
拂袖凌紫霄，跨鶴遙相訪。  
欣然許相從，無極恣來往。  
祝君真仙

姿襟懷多個儻長謝軒冕榮亦澹聲色想諒是長往人  
不待智者獎慚予骨相凡齷齪墮塵網金光許共餐願  
言執鞭鞅

丹陽尹來菲泉索題南峰圖為乃翁壽

明廖道南

會稽名山天下無千巖萬壑相縈紆南有峰積煙雨  
上應南極函靈圖獨羨茲圖分五嶽天風時來奏仙樂  
青鳥翩躚憶王母碧桃爛熳歌方朔方朔魁梧負俊才



文光璀璨輝星台三山海外祥煙繞五色雲中瑞氣迴  
儵見乘鳧儀漢殿御屏姓字天章絢遙獻南峰春霽圖  
虹橋萬里銀河轉

恩榮雙壽圖

為巽峰陳侍  
御父母賦

明 廖道南

我聞陳氏漢有元方與季方太丘品藻流芬芳宋有堯  
咨與堯叟省華訓戒歸仁厚乃今亦有樸菴翁巽峰子  
仰植天綱俯人紀翁昔山中獨考槃春猿秋鶴恣盤桓  
耽幽偏訪湘園竹采秀仍饒澧沚蘭時惟孟光偕隱德

相敬如賓親稼穡縞衣茹蕘更辛勤草閣茅簷共棲息  
嗚嗚儀形穆古風諄諄警誨抱精忠一經克永傳家澤  
三命端期懋國庸自昔分符浙西麓萬峰矗立瞻天目  
登巘恒歌岵岵篇望雲長効喬松祝結駟還乘御史驄  
英英斧繡北臺東簪筆朝叅邇英殿封囊夕達承明宮  
卽承簡命巡南土兩淮兆姓安如堵攬轡何須羨范滂  
勒碑終見思羊祜矧逢綸詔覃敷恩紫誥飛章及里門  
赫赫鴈冠輝老柏煌煌輦服映晴萱我時北上膺皇眷

招提樓閣羅清宴願乞南飛雙鶴詞置之堂上增歡忭  
我思古人為君賦太丘省華昌脩祚君乎移孝為忠貞  
憲度千載萬載勲名布

題雪巖圖壽麗卿乃翁

明 廖道南

雪巖何峻極江上玉芙蓉秀結峨眉地高標建業峰凝  
輝燭四野擬瑞慰三農細詠南山句嶙峋幾萬重

題彭宣慰壽圖

明 廖道南

寶牒開商祚金符錫漢朝江迴南國紀星轉北辰杓駿

烈超擒虎鴻勲集射鵬遙知彭祖壽歌頌滿雲霄

壽申封君歌題青鳥圖

明王世貞

君不見申公七尺虬髯蒼雙目稜稜紫石光賦成不肯  
獻天子大笑拂衣歸故鄉生駒挽弓三石強妙舞劒器  
黃金裝解言報恩公子里亦曾結客少年場懷中藍田  
雙白璧但令心知輕一擲歸來叩牀忽絕倒綠酒新熟  
琥珀色何言中路多齟齬閉戶談玄學冲舉石室時窺  
龍虎文洪崖亦送煙霞醕鄴河之傍春卜居三花琪樹

鬱庭間忽聞青鳥瑤池使銜得長安天子書囊中豈無  
羽毛藥相期且盡人間樂玳筵急管醉莫辭遲爾三山  
駕鸞鶴

題孟里圖壽尤母

明王世貞

尤郎顏鐵虬髯紅矯如嶧陽霜下松手攜客圖孟家里  
歸壽阿母觴春風孟母三遷去其故尤母却守先人宮  
啖子不必東家豬食親不必燕魚熊義方但就養志好  
圭簞也自春風中

題畫壽大參暘谷先生七十

明王世貞

永嘉城外小緱山明月長容笙鶴閒  
總為暘湖泉石好未教王子厭人間

為林子騰茂才題桃源圖壽

明王世貞

閩中喬木俱成林林家主人饒隱心  
時醕竹葉千斛酒來坐桃花萬樹陰  
淡日輕煙釀芳暝翠羽黃鸝喚妝醒  
開處疑蒸紫帽霞澆時欲涸旃檀井  
祝君度索三千春有子仍為金母珍  
漢帝方徵上林植可容長作武陵人

題靈椿圖壽卓徵甫光祿五十 明王世貞

君不甘小草人能頌大椿年希知命域齒是噉名人跡  
與籃輿舊才從彩筆新猶聞上苑色絕勝武陵春

題柏舟畫卷贈高母 明王世貞

誰言衛風蕩乃有共姜婦誰言吳趨薄亦有高令母當  
時髣髴歌柏舟今日青燈照白頭縱令淇澳清徹底爭  
似胥江不肯流

為范母題晚節寒香卷 明王世貞

離離澗傍竹英英籬邊菊芬不逐衆卉榮不依凡木凡  
木豈無陰衆卉先競馥疇能傲霜霰誰歟安幽獨中色  
比黃金清心映碧玉所以范母賢挺然範閨淑天澤豈  
不廣晚施意仍篤嘉命播中州清風藹然郁太師儻有  
陳彤管將見錄

張步兵懷椿壽萱卷

明黃相

我向京師為客久寅月出門將及酉月明白露下庭柯  
風振秋聲在高柳松楸雙壁雲鎖深節物驚心幾回首



凌晨有客來叩門懷椿壽萱卷在手乃是紫髯張步兵  
索我題詩紀其後自云生孩七月父見遺苦辛撫摩獨  
有母寂寥煦沫三十春兒頗成立母亦壽伶俜孤影曩  
到今何怙籲天天知否淚痕不盡雨痕斑號聲迴出江  
聲右反思白髮倚門人瓶罍相藉宜相守白魚青笋足  
冬春祿養色愉忝升斗負郭石田二頃餘種秫年豐催  
釀酒半澆三尺墳上茅半祝南山酌一卮遺書數卷不  
忍觀和膽一九長在口聞君此語重歎嗟幾家堂上雙

黃耆君猶得隴失蜀悲我似凡民更何有

題黃山煙樹圖為邵果齋內人壽明焦竑

黃山高凌紫清七十二峰煙樹橫軒皇曾此鍊金液  
手攜玉女朝瑤京遙遙一去幾千載猶有真風至今在  
梁鴻埋照世不知翻因德曜留光彩綺筵行酒宵向分  
舉杯相邀鸞鶴羣翠微渺渺丹霞接髣髴靈璫響綠雲  
大道希夷亦等閒仙源只在故鄉間莫如弄玉高臺上  
一逐簫聲定不還

題李公子喬松圖稱壽尊君臨淮侯

明焦竑

天上何人手自栽青蔥佳氣近蓬萊  
惟應帝子千秋後會見松花一度開  
雙闕風迴鸞縹緲孤峰雲盡鶴徘徊  
懸池擬獻長生露還伏郎君作賦才

題仙桃白鹿圖壽蔣參岳子徵  
明張鳳翼

朱明開壽域紫氣凝吳淞上有千歲實  
下有二茅龍杖屐寄東山聲華高岱宗  
雖開蔣詡徑已卜丁固松朝歌

麟趾章且也靈秀鍾熙朝崇世官次第期登庸

題扇壽愛蔬吳先生尊人

明顧清

江海歸來一幅巾東風八十四回春日長勘罷參同契  
坐對青山即故人

賦蟠桃圖為張時震父母壽

明顧清

玄洲髣髴海東涯海岸蟠桃大比瓜畫入彩鱗疑著霧  
望迷仙苑欲生霞稀年令德真相配紫府丹臺別是家  
我欲金壺借餘墨一枝併寫杏園花

題畫松石為吳赤含壽

明李日華

昂昂石大與髯翁丘壑煙霞氣骨同一自銖衣披拂後  
紫芝瑤草領春風

題竹溪圖壽竹溪老人

明李維楨

吾宗供奉謫仙人舊住徂徠溪水濱沿溪滿種蒼筤竹  
杯酒嘯歌偕隱淪竹色溪聲曾不改照映風流與文采  
龍鍾之竹產龍孫清溪一曲帶荆門古今兩見竹溪逸  
盛事吾宗少倫匹輸君七十能鬪健觸目琳琅紛繞膝

張君好事圖竹溪乞我詩為君品題供奉百詩酒一斗  
我詩一篇奉君酒酒如竹葉漾溪流溪成酒池可拍浮  
底事求仙仙亦謫一日醉鄉足千秋

題九如圖為高觀察四十壽

明董其昌

綱紀雄東表文章有代興江山增潤色日月共騫騰  
甫神鍾嶽蓬萊海閱陵郎潛猶始壯公夢已堪憑  
列柏羣鳥下鳴岡瑞鳳升出雲俱四嶽為壽叶三朋  
弧矢揆初度彤庭寵恰承穆如嗣作頌不獨九如稱

題百萱圖壽李本寧母太夫人 明董其昌

突兀古雲根紛敷赤棘翻堂前霞綵絢天上露華溫託質從玄圃忘憂合道言應持比金母百億化身繁

樂壽圖為潘百朋壽

明董其昌

江南欲作名園記海上河陽看世濟尚書綦履故遺聲  
右轄風流恢賜第考德真將獨樂同貽謀却與平泉異  
種木於今及百年歌鐘甲第常依然閱盡人間陵與谷  
肯堂肯構歸象賢森梢嘉樹成蹊逕突兀危峰出市廛

白水朱樓相掩映中池方廣成天鏡  
刷羽鳬鷺迎向人  
澆嚼游魚波不定  
水北樓臺照碧霄  
桂為棟兮蘭為橈  
邀賓盈百猶虛敞  
鼓吹數部仍寥寥  
水南嵐翠何縹緲  
瑯瑤雲根成夭矯  
磴道周遮洞壑深  
游人往往迷幽討  
飛梁百尺亘長虹  
別有林扉接水窮  
名花異藥不知數  
經年瑤圃留春風  
主人夙有煙霞賞  
王事馳驅多鞅掌  
又銜新詔五羊城  
萬里家山勞夢想  
不辭為作輞川圖  
一似披形入玉壺  
畫繡正看榮梓里  
年華況值挂桑弧



君不見鴻乙草堂傳畫史一丘一壑徒為爾又不見洪  
厓仙人拔宅居舊時城郭曾無餘何如世業儷金谷吏  
邪隱邪俱不俗五嶽仙山縱所如臥游鄉思常相續君  
生亦是我生辰大斗年年持介福

嘉平十四日題寫古梅壽襟海丈

明李日華

偶試呵冰手來拈琢玉花煙籠三百榦雪綴六千葩春  
信笑中得高情物外賒主人方介壽持此報年華

韓參議家慶圖

叔祖暨父  
各九十

元袁 楠

丹泉為醴菊為菹的的龐眉似畫圖萬石齒高勤澣洗  
二疏年並得歡娛兵前父老難尋伴眼底孫曾總業儒  
欲向碧桃花下醉斑衣紫綬兩相扶

張希孟嘉慶圖

其祖伯祖皆  
年過九十

元 袁 桷

舜泉清且甘歷山秀而朗溥風邈冷冷舊俗遺穰穰怡  
愉二老歡敷龐百歲長銀光浮勝頰素髮垂過項階庭  
尊孝謹閭里化庶讓春風連理枝晴日九節杖犢車共  
東西漁舫同上下蠶麻課餘閒豚韭隨薄養薇山悲首

陽菊潭陋胡廣媿彼非禮羅居然嬰世網孫枝孕天葩  
祖風躡遺響含飴記疇昔興門慰期獎冥鴻天機韜喬  
松白雲往緬馬清風佳庶作高山仰

秦元卿家慶圖

元馬祖常

天爵榮良貴皇家錫顯封恩光依上國寵渥蔭華宗椿  
悅荆交豔萱妍桂競穠園亭春掩映桑野畝縱橫令子  
官薇省諸孤胄辟雍儒功誰表率善俗此儀容

題晉寧申氏家慶圖

元程鉅夫

申家盛德映當時家慶圖中始見之盡出橐金援滯獄  
潛輸囊米濟鄰饑已驚賢婦能齊壽復見名郎有七兒  
最是舍傍羈旅者感恩猶自說流離

贈別柯伯庸歸省親柯自龍虎來臨安邀予三茅

山中出示方壺所作東柯谷圖及翰苑諸名公

詩一帙且曰吾垂白之母在堂將歸省焉請與

予別因賦此贈

東柯谷者蓋其家居地也

宋戴奎

天台萬八千丈高插天勢與鴈岩天姥諸峰連芒屨竹

杖昔尋訪層巒絕壁窮攀緣是時憑高一縱目異境復  
來東柯谷幾灣流水聯玦環數點晴峰刻瑤玉回頭十  
載昔未遊黃塵撲面雙鬢秋柯君一見與我談舊隱剪  
燭共醉吳山樓示我東柯之圖纔數尺元氣溶溶霧煙  
溼玉堂諸老亦神仙錯落文章列圭壁君言束髮居龍  
虎學仙期與松喬伍生平雖只戀還丹歲久寧無念鄉  
土嗟吁故林歸獨遲相逢異縣魚喜悲細觀詩畫久不  
厭躊躇如在登臨時錢塘五月熟梅雨此日憐君一帆

舉縮地應無跋涉勞升堂要覩慈顏喜紫霓裳丹霞酒  
拜奉親前為親壽喜懼雖因鶴髮前踟躕復似斑衣舊  
西風一日秋滿山羣仙有約須君還路經茅君壇下幸  
相報我亦從之放迹蓬瀛間

題方壺子天台圖送曹士安省親還上清

元  
丁復

仙人飈車竟獨往我家天台不得還六十江上老為客  
半夜夢中無數山雲飛舍下兩白髮桃熟溪頭雙綠鬟

更煩爾祖方壺子寫我與君劉阮間

題劉山長雪夜板輿圖

元薩都拉

板輿行樂處鶴髮儘髣髴人子誰無母劉家獨有男諸  
孫嬉掌上阿母度溪南玉宇光連夜顏酡酒半酣

題胡伯衡飛雲圖

元楊載

未應時命固相違千里遨遊久不歸已占龍頭承紫詔  
更斬馬首賜朱衣塵沙客路牽愁遠泉石家鄉入夢稀  
日夜思親心更切滄浪悵望白雲飛

家山飛雲圖

元程鉅夫

吳雲楚客兩羈孤我亦先人有敝廬風雪江湖歸路遠  
不知誰為寫成圖

題潘叔寬望雲圖

元貢師泰

日入無返照雲出有歸期雲歸在山阿親死獨何之思  
親不可見亦有墓與祠朝望怡我目夕望慰我思風吹  
白楊樹露滴青松枝翩翩華堂鶴鳴聲一何悲不有望  
雲作孰繼南陔詩



望雲思親圖為王大使作

元丁鶴年

山人愛雲不離山巢居只在雲松間枕前漱玉弄明月  
此心直與雲俱閒達官愛雲雲作侶平步青雲稱高舉  
天瓢一滴慰蒼生大旱用汝為霖雨王公出處與此二  
者殊十年游宦感離居衣上猶存慈母線手中長把嚴  
君書日日看雲不遑暇為有吾親舍其下恨身不得逐  
雲飛却寫飛雲入圖畫公餘展玩凝心神見雲如見吾  
雙親卷圖仍寄吾親舍永奉高堂長壽身狄公盛事王

公繼今古孝思同一致

題張伯源夢父還家圖

元張庸

東海浩無極潮生如有期為客千里外歸程杳難知阿  
爺昔向西州去望斷風塵不知處潮生潮落幾朝暮門  
前踏破青莎路小窗月落天宇寒夢爺忽從東海還明  
朝即上長溪道豈意相逢溪上山道傍躑躅驚復喜瘦  
影塵衣如夢裏艱難共說別離情不知有淚如泉水君  
不見世塗橫絕豺虎前千里感夢只自憐海波腥吐蛟

龍涎幾人渡此能生全歸來宴坐奉顏色眼中如覩天  
日白剗肌煮麋身不惜勸爺莫作他鄉客

題陳象之與母避寇圖

元張庸

海去松溪纔數里溪流直下隨海水玉虹飲水夜不收  
一朝海寇如蠭起陳君溪上居有母八十餘傳聲海寇  
至啼散樹頭烏吹脣鼓譟海倒立憑誰與母天雨泣神  
使婁生與之俱寇竟追之不能及初懼力不勝何以逃  
母生籃輿軋軋翻覺輕瞬息前行知幾程寇方抄掠猶

未去與母更入山深處緣崖覓路恨不飛縱有遺金寧  
復顧黑風撼海寇上船夜來始覺無烽煙次第歸來訪  
鄰里幾家骨肉誰家全眼前生理誰暇數見母加餐忘  
却苦

瞻雲圖

明 廖道南

梁公千里獨瞻雲春到鄉山草木芬我亦有懷登岵屺  
夜深孤立看星文

李氏奉親圖

元 程鉅夫

高唐李家宜入史世世順孫并孝子今人創見古尋常  
養志承顏政如此春風秋月花滿川小車長耳相後先  
生綃二尺粉墨其中有至樂無由宣坐中親賓歌拍手  
宇宙之間一樽酒黃犬東門竟不歸青牛西去知存否  
何如我翁八十強紅顏雪鬢雙電光醉歸不怕驢自穩  
有兒左右扶車箱長聞貞觀開元際老大昇平飽嬉戲  
丹青不見見殘編好護新圖示來世

題白華圖為本齋王公

元王壽衍

母慈子孝覺天全桃發華枝豈偶然名士品題圖畫卷  
他年當不負凌煙

題白華圖為本齋王公

元湯彌昌

白華載補三百篇蟠桃一實三千年方士招魂術通仙  
思母念母心通天孝感誠應玄又玄生祥下瑞理則然  
圓明示寂佛果圓王母今在瑤池前白華變幻丹葩妍  
蟠桃彷彿青枝連玉苞瑩若冰壺懸心目洞照無中邊  
太史載筆青瑤鐫斯文斯文百世傳

題白華圖為本齋王公

元陳方

蓼莪霜氣入袈裟  
銘筆當歸學士家  
更為白華添後傳  
東風誰忍看山茶

題白華圖為本齋王公

元龔璠

白華久不補誰識孝子心  
寸草報春暉後來存雅音  
散火冰雪中孤標凝太陰  
一氣類冬筍冷燄分蕭岑  
茫茫東海波斂之碧壺深  
花如慈顏開枝似兒手簪  
王氏琳琅秀佛香薷蔔林  
孝子獨何為感通無古今

御定歷代題畫詩類卷一百十八



欽定四庫全書

御定歷代題畫詩類卷一百十九目錄

雜題類

燕爾館破屏風所畫至精人多歎賞題之唐劉禹

錫

楊子華畫唐元稹三首

資聖寺諸畫倣柏梁體唐段成式張希復鄭符

病起見圖畫唐僧齊己

題童氏畫

唐闕名

觀何君寶畫

宋梅堯臣

表臣齋中閱畫而飲

宋梅堯臣

趙令晏崔白大圖幅徑三大

宋蘇軾

子由新修汝州龍興寺吳畫壁

宋蘇軾

王維吳道子畫

宋蘇軾

王維吳道子畫

宋蘇轍

畫歎

宋蘇轍

石無咎畫苑 宋陳師道

題鄭防畫夾 宋黃庭堅三首

謝鄭閣中惠高麗畫扇 宋黃庭堅二首

題仁老所畫枕屏 宋鄒浩五首

贈畫士龔子 宋陳造

題趙生畫 宋陸游

曝舊畫 宋陸游

催老融墨戲 宋樓鑰

跋周忘機畫

宋劉克莊

題宣和御畫

宋王庭珪

史畫吟

宋邵雍

詩畫吟

宋邵雍

儒衣陳其姓工於畫牛馬魚一日持六簇為贈以

換詩

宋戴復古

詠畫贈趙道士

宋文天祥

題公震畫後

宋僧道潛二首

觀曹夫人畫 宋僧道潛三首

蒲元亨畫四時扇圖 宋僧德洪

詠破屏風 唐姚合

御定歷代題畫詩類卷一百十九目錄

欽定四庫全書

御定歷代題畫詩類卷一百十九

雜題類

燕爾館破屏風所畫至精人多歎賞題之

唐  
劉禹錫

畫時應遇空亡日賣處難逢識別人  
惟有多情往來客  
強將衫袖拂埃塵

楊子華畫  
三首

唐  
元稹

楊畫遠於展何年今在茲依然古妝服但感時節移念  
君一朝意遺我千載思子亦幾時客安能長苦悲

皓腕卷紅袖錦鞵臂蒼鶚故人斷絃心稚齒從禽樂當  
年惜貴遊遺形寄丹腹骨象或依稀鉛華已寥落似對  
古人民無復昔城郭予亦觀病身色空俱寂寞

顛倒世人心紛紛乏公是真賞畫不成畫賞真相似丹  
青各所尚工拙何足恃求此妄中情哀哉子華子

資聖寺諸畫傲柏梁體

唐段成式張希復  
鄭符聯句



吳生畫勇正戟攢

成式

出變奇勢千萬端

希復

蒼蒼鬼怪層

壁寬符

覩之忽忽毛髮寒稜伽之力所疲殫

成式

李真周

昉優劣難符

活禽生卉推邊鸞

成式

花房嫩彩猶未乾

希復

韓幹變態如激湍

符

昔哉壁畫勢未殫後人新畫何汗

漫

希復

病起見圖畫

唐僧齊已

病起見圖畫雲門興似饒衲衣椽笠重嵩岳遠山遥命

在齋猶赴刀閒髮盡凋秋光漸輕健欲去倚江橋

題童氏畫

唐闕名

林下材華雖可尚  
筆端人物更清妍  
如何不出深閨裏  
能以丹青寫外邊

觀何君寶畫

宋梅堯臣

燕馬易畫吳牛難圖  
馬骨應細牛骨麤  
馬毛要密牛毛疎  
麤疎必辨別細密多模糊  
乃知戴嵩筆能出韓幹  
徒幹馬精神在韁勒  
嵩牛怒鬪無牽拘  
昨日何家觀小軸  
絹雖破爛色不渝  
二頭相觸角競犄  
前脚如跪後脚舒

尾株榻直脊脊蹙筋力寫盡蹄腕殊一勝一敗又苦似  
勝者狠逐敗者趨卷窮赤印置小字置字乃是陶尚書  
尚書國初人愛畫收幾厨買時不惜金與帛帛載羊車  
錢載驢後世兒孫不能保賣入窮市無須臾凡目矜新  
不重故千錢酬直皆笑愚四牛遂為何氏有裝背入眼  
天下無坐中吾儕趣已異又喜玄女傳兵符此本實稱  
閻令畫下筆簡細容顏殊三人鬼狀一牛首八女二十  
美大夫黃帝中間蔭葩蓋霞扇錯玳旌擁朱冠服難知

歲月遠但見儀衛森清都復觀鹿臺獨夫愛姐已不笑  
何由娛酒池肉林騎行鬲剖心斲脛堪悲吁數幅吳王  
宴西子綵舟張樂當姑蘇宮娥數百簇高下鬢髻一一  
紅芙蓉危風細浪得平遠前對洞庭傍太湖商紂夫差  
可垂誠歷世傳玩參盤盂雕鷹草木不足記特詠此事  
心何如

表臣齋中閱畫而飲

宋梅堯臣

嘗觀韓幹馬人物亦如生君收四病骨無肉只崢嶸二

匹痒磨樹二匹縱其情意思若不任千里未可行古絹  
蠹已盡彩色無精明歎惜傳至此幾人金帛輕隋時有  
名筆獨寫嚴君平猶持杖頭錢罷肆心莫營魁然中貴  
人坐榻不知名畫中有畫屏山石侔天成今時長沙叟  
獼猴檨林橫疏毛與設色前代何角爭餘存品雖高我  
未易敢評主人愈好事緘筭酒壺傾

趙令晏崔白大圖幅徑三丈

宋蘇軾

扶桑大繭如甕盎天女織綃雲漢上往來不遣鳳銜梭

誰能鼓臂投三丈人間刀尺不敢裁丹青付與濠梁崔  
風蒲半折寒鴈起竹間的皪橫江梅畫堂粉壁翻雲幕  
十里江天無處著好臥元龍百尺樓笑看江水拍天流

予由新修汝州龍興寺吳畫壁

宋蘇軾

丹青久衰工不藝人物尤難到今世每摹市井作公卿  
畫手懸知是徒隸吳生已與不傳死那復典刑留近歲  
人間幾處變西方畫作波濤翻海勢細觀手面分轉側  
妙算毫釐得天契始知真放本精微不比狂花生客慧

似聞遺墨留汝海古壁蝸涎可垂涕力捐金帛扶棟宇  
錯落浮雲卷新霽使君坐嘯清夢餘幾疊衣紋數衿袂  
他年弔古知有人姓名聊寄東坡弟

王維吳道子畫

宋蘇軾

何處訪吳畫普門與開元開元有東塔摩詰留手痕吾  
觀畫品中莫如二子尊道子實雄放浩如海波翻當其  
下手風雨快筆所未到氣已吞亭亭雙林間彩暈扶桑  
暎中有至人談寂滅悟者悲涕迷者手自捫蠻君鬼伯

千萬萬相排競進頭如黿摩詰本詩老佩芷襲芳蓀今  
觀此壁畫亦若其詩清且敦祇園弟子盡鶴骨心如死  
灰不復溫門前兩叢竹雪節貫霜根交柯亂葉動無數  
一一皆可尋其源吳生雖妙絕猶以畫工論摩詰得之  
於象外有如仙翮謝籠樊吾觀二子皆神俊又於維也  
斂衽無間言

王維吳道子畫

宋蘇轍

吾觀天地間萬事同一理扁也工斲輪乃知讀文字我



非畫中師偶亦識畫旨勇怯不必同要以各善耳壯馬  
脫銜放平陸步驟風雨百夫靡美人婉婉守閒獨不出  
庭戶修容止女能嫣然笑傾國馬能一蹴致千里優柔  
自好勇自強各自勝絕無彼此誰言王摩詰乃過吳道  
子試謂道子來置汝所挾從軟美道子掉頭不肯應剛  
傑我已足自恃雄奔不失馳精妙實無比老僧寂滅生  
慮徵侍女閒潔非復婢丁寧勿相違幸使二子齒二子  
遺跡今豈多岐陽可貴能獨備但使古壁常堅完塵土

雖積光焰長不毀

畫歎

宋蘇轍

武燕未遠嗟誰識趙董紛紛枉得名已矣孫陳舊人物  
至今但數漢公卿

石無咎畫苑

宋陳師道

卒行無好步事忙不草書能事莫促迫快手多麤疎君  
看荷葦榭葉扇崔家中叔三人俱埽除事物費歲月收  
完神氣忘形軀恍然有得奪天巧衰顏生態能相如市

師信手無贏餘一日畫出東封圖眼前百口怪神速背  
後十指爭挪揄君家畫苑傾東都錦囊玉軸行盈車補  
完破碎收亡逋欲得不計有與無問君此病何當祛君  
言無事聊自娛世間何事非迷途挾策未必賢樗蒲苑  
中最愛文與蘇情親不獨生同閭自謂知子誰如予叔  
也不癡回不愚憐君用意常勤渠揮毫灑墨填空虛風  
梢雨葉出新意老樹僵立何年枯我生百事不留意外  
物不足煩毆除翰墨纔能記名字摹臨寫貌無工夫見

弱不救危不扶獨無一物充庖廚看君髮漆顏丹朱意  
氣健如生馬駒逢人不信六十餘郁然一莖無白鬢呂  
公落寞起釣屠南山四老東宮須人生晚達有如此應  
笑虞翻早著書

題鄭防畫夾

三首

宋黃庭堅

子母猿啼榭葉山南山北危機世故誰能樗里穀中皆  
是由基

惠崇煙雨歸鴈坐我瀟湘洞庭欲喚扁舟歸去故人言

是丹青

折葦枯荷共晚紅  
榴苦竹同時睡  
鴨不知飄雪寒  
雀四顧風枝

謝鄭閣中惠高麗畫扇

二首

宋黃庭堅

會稽內史三韓扇  
分送黃門畫省中  
海外人煙來眼界  
全勝博物註魚蟲

蘋汀遊女能騎馬  
傳道蛾眉畫不如  
寶扇真成集陳隼  
史臣今得殺青書

題仁老所畫枕屏

五首

宋 鄒浩

昔侍先君官四明往來皆向此中行  
昊天欲報嗟何及  
空對小屏無限情

萬頃紅蕖照落暉五雲門外賀家池  
別來無復當時興  
二十四年空自知

古堰橫空舟楫回曹娥江上候潮來  
全家彌月寒光裏  
日日鮮鱗醉潑醅

天華寺前維小舟僧牕軒豁留清眸  
平湖秋霽淨如鏡

時復輕輕飛白鷗

身在九疑麓門當二水流誰知剡中勝朝夕助嬉遊

贈畫士龔子

宋陳造

古人論畫索畫外世俗區區較形似眼明亦有可人者  
龔子畫形兼畫意秋蘭春蕙相與芳梅花照影生暗香  
倚煙映霧各夸嫵併作短軸供寶藏斬新雪色三大壁  
勝日煩渠揮淡墨楂枒老樹對醜石龍騰獸伏起恍惚  
松底跳波隱隱轟千輦石間橫斜風竹相因依長翁雅

趣在水竹新開湖南規辦五畝綠此松此石偕四友身  
未出門先在目暮年供給良易足龔子惠我真絕俗萬  
錢酬贈不領頤新詩渠能飽君腹平生好事吾屢空龔  
子好事未後翁藏詩寶畫從人笑與子把玩無終窮

題趙生畫

宋陸游

東都畫手排浮萍天子獨賞一趙生幅縑尺紙皆厚賜  
衆史妒媚都人驚邇來一筆不復見好事往往空聞名  
奇哉此獨出劫火論價直恐千金輕老蘆博士最別識



一見自謂雙眼明老夫寓居旱河上矮軸正向幽窗橫  
飯餘捫腹看不厭林外重閣高崢嶸憑誰喚住兩禪客  
水邊共聽煙鐘聲

曝舊畫

宋陸游

故篋開緘一愴情斷縑殘幅尚知名翩翩戲鵲如相語  
洶洶驚濤覺有聲柳暗正當煙未斂花穠仍值雨初晴  
百年手澤存無幾蟲蠹塵侵祇涕橫

催老融墨戲

宋樓鑰

古人惜墨如惜金老融惜墨如惜命濡毫洗盡始輕拂  
意匠經營極深處人非求似韻自足物已忘形影猶映  
地蒸宿霧日未高雨帶寒煙山欲暝中含太古不盡意  
筆墨超然絕畦逕畫家安得論三尺身世生緣俱墮甌  
人言可忘不可親夜半叩門寧復聽三生宿契誰得知  
一見未言心已應巖傾千丈雪散空上有清池開錦鏡  
意行忽覺發虎嘯許作新圖寫幽勝歸尋一紙五十尺  
傳以礬膠如練淨自知能事難促追卷送松牕待清興

筆端寸寸意何如西抹東塗應畧定何當一日快先覩  
洗我昏眸十年病

跋周忘機畫

宋 劉克莊

周郎詞藝妙天下似是詩家非畫家寧與嵇公寫琴操  
不為盛尹作梅花

題宣和御畫

宋 王庭珪

玉鎖宮扉三十六誰識連昌滿宮竹內院寒梅欲放春  
龍池水暖鴛鴦浴宣和殿後新雨晴兩鵲飛來向東鳴

當時妙手貌不成君王筆下春風生長安老人眼曾見  
萬歲山頭翠華轉恨臣不及宣政初痛哭天涯觀畫圖

史畫吟

宋邵雍

史筆善記事畫筆善狀物狀物與記事二者各得一詩  
史善記意詩畫善狀情狀情與記意二者皆得精狀情  
不狀物記意不記事形容出造化想像成天地體用自  
此分鬼神無敢異詩者豈於此史畫而已矣

詩畫吟

宋邵雍

畫筆善狀物長於運丹青入巧思萬物無遜形詩  
筆善狀物長於運丹誠丹誠入秀句萬物無遜情詩者  
人之志言者心之聲志因言以發聲因律而成多識於  
鳥獸豈止毛與翎多識於草木豈止枝與莖不有風雅  
頌何由知功名不有賦比興何由知廢興觀朝廷盛事  
壯社稷威靈有湯武締構無幽厲敵傾知得之艱難肯  
失之驕矜去巨蠹姦邪進不世賢能摘陰陽粹美索天  
地精英籍江山清潤揭日光榮收之為民極著之為

國經播之於金石奏之於大庭感之以人心告之以神明人神之胥悅此所謂和羹既有虞舜歌豈無臯陶賡既有仲尼刪豈無季札聽必欲樂天下舍詩安足憑得吾之緒餘自可致昇平

儒衣陳其姓工於畫牛馬魚一日持六簇為贈以

換詩

宋戴復古

生絹六幅淡墨圖伊人筆端有造化驂騑汗血掣電光牯犍倦耕眠草下陂塘漠漠煙雨後出水羣魚戲瀟灑

細看物物有生意不比尋常能畫者請君就此三景中  
揮毫添我作漁翁岸頭孤石持竿坐白鷺同居蒲葦叢  
有時尋詩出游衍款段徐行山路遠奚奴逐後背錦囊  
木杪斜陽鴉噪晚有時蓑笠過田間農婦農夫相往還  
手放鉏犂吹短笛日暮青郊黃犢閒王孫貴人不識此  
此是吾儂佳絕處挂君圖畫讀吾詩令人懶踏長安路

咏畫贈趙道士

宋 文天祥

欲覓龍泉舊時筆相傳此手世間無黃金不買昭君本

只買嚴陵歸釣圖

題公震畫後

二首

宋僧道潛

錯莫江雲結暝陰  
歸飛宿翼半浮沉  
毫端領畧無遺種  
想見雍容物外心

蒹葭照雪含餘潤  
古木攙天氣老成  
山谷不來居士死  
何人為予一題評

觀曹夫人畫

三首

宋僧道潛

野水平林渺不窮  
雪翻鷗鷺點晴空  
洞房豈識江湖趣



意象冥將造化同

華屋生知世冑榮誰教天付與多能西風白草牛羊晚  
隱見橫岡一兩層

臨平山下藕花洲旁引官河一帶流兩櫂風帆有無處  
筆端須與細冥搜

蒲元亨畫四時扇圖

宋僧德洪

畫工妙物無不可誰能筆端自忘我醉蒲睡著呼不聞  
但見解衣盤礴羸起來漱墨滋破研霜綃咫尺開紈扇

點綴四時無不有但見眼前紅綠眩雲破連峰青碧開  
林梢時復見樓臺斷橋落日空流水為問秦人安在哉  
春山杳靄知何處夏木森森蔽風雨秋陰未破雪滿山  
笑指千峰欲歸去

詠破屏風

唐姚合

時人嫌古畫倚壁不曾收露滴膠山斷風吹絹海秋殘  
雪飛屋裏片水落牀頭尚勝凡花鳥君能補綴不

御定歷代題畫詩類卷一百十九

欽定四庫全書

御定歷代題畫詩類卷一百二十目錄

雜題類

題惠崇畫

元馬祖常

郭忠恕十幅

元鄧文原

題畫

元虞集

題山石猿鳥圖

元楊載

時中兄示余畫一軸畫一老翁推獨輪小車上載

兩巨甕意其為警世之為因為賦詩 元楊載

贈畫工黎仲瑾 元歐陽玄

大年小景 元張翥三首

東夷倭人小摺疊畫扇子歌 元吳萊

題小景 元杜本

用王叔明韻題畫 元倪瓚

畫寄王雲浦 元倪瓚

題畫貽王光大 元倪瓚二首

翠竹靈壁圖 元錢惟善

題許道寧畫軸 元馬臻

馬遠小景 元張雨二首

畫扇 元唐肅

題畫扇便面 元張渥

題雜畫卷子 明劉基

題安南陳內相雜畫 明林弼二首

題水墨小景 明王恭

題趙松雪畫

明虞堪四首

題黃鶴山人王叔明畫

明平顯

題丁野夫畫

明平顯

題畫贈友

明張適二首

題畫

明張適

題畫

明李進

題畫

明陳憲章二首

題松雪圖

明陳憲章

題福山曹氏畫

明劉溥

和石田題王濬之畫扇

明吳寬二首

題倪雲林畫

明吳寬

題畫

明儲瓘

題畫

明沈周

題小畫

明陸深二首

贈張揮使小畫

明廖道南

題畫贈張冰溪

明廖道南

贈馮畫師明廖道南

陸包山述李三塘見推為題畫明蔡羽

題畫贈朱拱之明謝承舉

題倪元鎮小畫明王世貞

題王子裕僉憲詩畫冊後明王世貞

為秋野題畫明王世貞

黃生行贈善畫者亦明鄉客也明王世懋

題顧文康畫明王世懋



寄章廷綸畫史 明邢侗

廣仁院畫壁 明湯顯祖

題畫贈蜀中尹使君惺麓 明董其昌

題畫贈張平仲充守 明董其昌

題畫 明程嘉穉二首

題畫 明李日華

題謝孔昭雨中過沈孟淵所詩畫 明王穉

題沈公濟雪中過沈孟淵所詩畫 明王穉

為香山顧敬中題畫 明賀甫

題雲林畫 明陳則

題畫 明僧智旌

御定歷代題畫詩類卷一百二十目錄

欽定四庫全書

御定歷代題畫詩類卷一百二十

雜題類

題惠崇畫

元馬祖常

龍門千尺梧桐樹多在石崖懸絕處上有古巢生鳳皇  
鳳皇臺高山水長吳蠶八繭白雲絲畫史落筆光陸離  
江天萬里莫射鴈春草年年出湖岸

郭忠恕十幅

元鄧文原

雒陽畫史稱忠恕尺素能窮造化工翠嶂倚雲天外落  
高林飛雨望中叢彤樓風暖歌聲細綺閣春深舞袖紅  
應是宣和多愛惜故將題墨琬琰同

題畫

元虞集

緝熙殿裏御屏風零落誰收百歲中錦樹總含春雨露  
畫橋猶是舊青紅花開陌上懷歸燕潮落江頭送去鴻  
何似綠波生太液絳桃風急綵船東

題山石猿鳥圖

元楊載

萬卷堆中昏欲睡忽見畫圖醒我意眼前崖谷起嵯峨  
便似著身遊此地榱桷櫨櫨大百圍奔泉透石霹靂飛  
玄猿孤峙憩美蔭下視白鳥娛清暉昔聞虞舜狩南嶽  
君子相隨化猿鶴往往此輩猶爾為慨想雲林真可樂  
拔劍斫山山骨露山鬼呶嚶安敢怒祇今踴躍歸去來  
莫愁無覓誅茅處

時中兄示余畫一軸畫一老翁推獨輪小車上載  
兩巨甕意其為警世之為因為賦詩

元楊載

小人無他獨嗜利兩甕載車將遠致肩賴足趼汗潸然  
冉冉修程胡不畏世人但笑愚翁愚甕破即與瓦礫俱  
不知人有千金軀前行險道方乘車

贈畫工黎仲瑾

元歐陽玄

吾聞甚弘之忠裂金石精氣千年化為碧人生賴有方  
寸妙萬變神奇從此出又聞西方梵僧名法能能令兩  
眼碧色晶熒熒有時肘後灑墨汁纖穠疎秀皆成形碧

山畫欲入神品表裏神光碧瞳炯浮嵐暖翠山不受盡  
付晴牕落泓影碧山學士今為誰玉堂茆舍各有時煩  
君添我山下屋更看白雲相陸離

大年小景

三首

元張翥

一川風柳綠僂僂古木茅茨近澗阿溪上無人船不渡  
水禽飛處夕陽多

春淡空山不自聊幽花老盡國香銷只今愁絕沅湘路  
誰與侯芭賦楚招

采采幽芳不盈把  
好收風霧入銅瓶  
虎丘老衲今何在  
思見嵯岬石上青

東夷倭人小摺疊畫扇子歌

元吳棊

東夷小扇來東溟  
粉牋摺疊類鳳翎  
微颺出入揮不停  
素繪巧豔含光熒  
銀泥蚌淚移杳冥  
錦屏卷盡散紅青  
皓月半割蟾蜍靈  
紫雲暗惹鮫魚腥  
徐市子孫附飛舲  
翕然家世雜梵經  
文身戴弁舊儀形  
對馬絕景兩浮萍  
殊方異物須陳廷  
富賈巨舶窺天星  
祝融噓火時所丁



島濱賣簞送清冷白龍浸皮暑欲醒玉階涵水夜撲螢  
蓬萊仙人降輜輶扶桑繭絲結綵艇祖洲芝草釀綠醺  
穹龜巨鼈動遭刑海神惜寶鼎雷霆鄙夫臥病臨虛局  
蒲葵百柄稱使令冰漿蔗液但滿瓶石榻被髮氣自寧  
新羅一念終飄零塗修雉尾吾何銘

題小景

元杜本

秋雲滿地夕陽微黃葉蕭蕭鴈正飛最是江南好天氣  
村醪初熟蟹螯肥

用王叔明韻題畫

元倪瓚

王郎筆力追前輩海岳新圖入臥遊獨鶴眠松猶警露  
孤猿挂樹忽驚秋陶潛宅畔五株柳范蠡湖中一葉舟  
同煮茯苓期歲暮殘生此外更何求

畫寄王雲浦

元倪瓚

吳淞江水漾春波江上歸舟發櫂歌邀我江亭醉三日  
鳳笙鸞吹拂雲和紛紛省署縻官職老我澄懷倦遊歷  
看君骨相自有仙故作長松挂青壁

題畫貽王光大

二首

元俛璣

荆南山色隱晴湖，暖翠當牕不用圖。  
避世移家今十載，盛書連舸泊三吳。  
可憐畫卷撩歸夢，依舊香奩傍藥爐。  
珍重故人王架閣，筆能扛鼎要人扶。

荆南山色青如染，卜築正當溪水南。  
浪舞漁舟鷗泛泛，雪消沙渚柳參參。  
涼軒楓葉晴雲綴，秋浦荷花落日酣。  
舊宅不歸幽夢遠，吳淞聊結小禪龕。

翠竹靈壁圖

元錢惟善

江上聞瑤瑟雲端擁翠旗  
楚王空有夢那得見貞姿

題許道寧畫軸

元馬臻

畫師天與力落筆貴宏壯  
神巧刻虛無衆色為彫喪  
嘗聞許道寧氣逼韋偃行  
君家見茲圖激我泉石況  
午光翻素壁錯愕引遐望  
冥冥霧靄霽水木散清曠  
遠近層岡來造設不可狀  
初如擁陣馬忽覺轉疊浪  
秋高岸容瘦迴風進歸榜  
山陽最奇秀安得數椽傍  
終然記華巔蕭蕭擺塵埃  
因思造化理詩成一惆悵

馬遠小景 二首

元張雨

柳未藏鴉雪未消春衫遊子馬蹄驕去年沽酒樓前路  
錯認桃花第一橋

玉砂卷海白糝糊千樹梅花埽地無彷彿水仙祠下路  
金枝翠帶不勝扶

畫扇

元唐肅

建章初月朗太液正風微肅肅房櫳掩團團玉甃窺高  
梧擁翠豔文石駐流輝葉密聲翻細峰多影屢移歌姬

掩越調舞女卷秦衣莫泚芭蕉露愁題紈扇詞

題畫扇便面

元張渥

一自蘭亭飛筆後昭陵風雨夜如何當年老媪能知此  
扇出人間百價過

題雜畫卷子

明劉基

山川出雲霓谿谷藏虎豹枯樹嶒嶸身怪石魄暑貌竹  
枝如琅玕煙雨昏幕罩梅花雪中開的皪珠磊皪蘭獨  
稱國香姱麗最可樂萸纖草堪藉葛覃棘能抓宋公學

元暉駭獸見騰鵲老班性嗜酒藻思發餘醪丹丘泣龍  
髯零落江湖櫂顛王食敗筆得米動盈窖僧明本靜者  
一藝起衆鬪展卷見歷歷聊足解喧囂裁詩慕韓豪瑣  
細非所較

題安南陳內相雜畫 二首

明林弼

白石青蒲春水生夕陽毛羽照沙明戲拈畫筆知何處  
柳外池塘艇子輕

隴頭春樹拂雲紅學語聲輕弄晚風上國祇今辭遠貢

漫愁雙翮閑雕籠

題水墨小景

明王恭

江城何人夜吹笛  
零落梅花曉無跡  
仙嶠蒼茫隔海青  
人煙寂歷連秋色  
何處征帆天際歸  
夕陽楓樹鳥邊微  
磯頭亦有垂綸者  
甘向滄浪老布衣

題趙松雪畫

四首

明虞堪

江上晴天錦繡紋  
丹崖紅樹思紛紜  
毫端染得秋無際  
猶是蒼梧幾片雲



王孫今代玉堂仙  
自畫苔溪似輞川  
如此青山紅樹底  
可無十畝種瓜田

玉簫吹斷幾黃昏  
南國風流竟莫論  
帝子不悲秋色晚  
墨痕何以著啼痕

竹色蕭蕭木葉齊  
石邊芳草迴淒迷  
斷猿月落愁人去  
正在黃陵廟裏啼

題黃鶴山人王叔明畫

明平顯

我昔見之湖上居  
當門萬朶翠芙蓉  
承平公子有故態

文敏外孫多異書閒吮彩毫消白日夢騎黃鶴上清虛  
此圖定倚吳山閣醉點南屏春雨餘

題丁野夫畫

明平顯

髻丁已沒四十載化鶴歸來知是非郭外梅邨更地主  
筆端松石見天機一時好手不可遇千古賞音如此稀  
長憶西湖舊遊處畫船清雨白鷗飛

題畫贈友二首

明張適

建溪山下是君家別後長松幾度花他日乞身歸去路

扁舟獨櫂白鷗沙

我有草亭南澗阿琴僧吟子日相過別來猿鶴驚猜久  
石壁春風長薜蘿

題畫

明張適

雨餘澗壑泉爭赴月上林臯鶴未眠且詠涼天嘉樹下  
更將幽意寫芳絃

題畫

明李進

飛花入簾宮漏長遊絲落絮春茫茫金鞍駿馬青絲勒

綺閣小姬紅粉妝黃金作丸落花底啼鳥隔花飛不起  
明朝更欲載東風早買樓船放春水

題畫 二首

明陳憲章

金籠鎖鸚鵡山木縱斑鳩巧拙知誰是天機不自由  
髮與疎梅白身將寡鶴親孤山殘雪夜清絕凭闌人

題松雪圖

明陳憲章

元時有箇趙松雪松雪於今又屬誰一幅丹青一瓢飲  
廖公來乞老夫詩

題福山曹氏畫

明劉溥

歌舞當年只醉遊，不知何物是閒愁。  
如今桐樹無人洗，風雨空山幾度秋。

和石田題王濬之畫扇

二首

明吳寬

尺圖宛見秋溪春，我昔經行記得真。  
欲作畫評重閣筆，至今還屬當行人。

紫藤花落石臺春，隱者幽居寫最真。  
畫品平生應自定，何須延譽待他人。

題倪雲林畫

明吳寬

黃金散與列仙儒  
江上扁舟逐釣徒  
為語紛紛評畫者  
要知迂叟不為迂

題畫

明儲璫

沙浦波明碧樹攢  
杏花疎雨澹生寒  
京城殢却江南夢  
試問吳船借畫看

題畫

明沈周

芳時中酒病難降  
朝日烘人始啓牕  
可怪楊花輕薄甚

盡扶春去落煙江

題小畫

二首

明陸深

箬葉舟能大桃花水正新了知魚有樂袖手捲絲綸  
雜花冥冥巔雲低紫豔紅芳各自奇最愛午風吹作陣  
杜鵑枝颺海棠絲

贈張揮使小畫

明廖道南

萬綠陰中一草堂將軍羽獵賦長楊蒼鷹赤豹來西域  
寶劍形弓出上方

題畫贈張冰溪

明 廖道南

碧樹蒼茫翠霧開  
風泉雲壑共徘徊  
春深啼鳥花爭發  
莫遣山靈浪自猜

贈馮畫師

明 廖道南

白髮青僮擬列仙  
桃溪溪上臥雲泉  
虎頭心事龍眠手  
點染長臨萬里川

陸包山述李三塘見推為題畫

明 蔡羽

披展雲山話雨中  
士龍人品李膺風  
荊州士論虛叨忝



借筆題詩看洗桐

題畫贈朱拱之

明謝承舉

君山兀兀湖水急爛銀盤中螺一粒老龍把弄蒼玉枝  
飛濤掀空海神泣振林裂石孤月明劃然似覺天西傾  
持將濁世驚妖魅媿作笙竽新樣聲

題倪元鎮小畫

明王世貞

懶瓚真懶瓚殘楮復殘墨不結丹青緣物外寫秋色

題王子裕僉憲詩畫冊後

明王世貞

江東再見王摩詰寶界山頭即輞川一自丹青題句後  
白雲秋色重蒼然

為秋野題畫

明王世貞

飄盡江頭蘆荻花疎疎黃葉見人家由他庾信能蕭瑟  
社酒雞豚樂未涯

黃生行贈善畫者亦明卿客也

明王世懋

吳公好士天下無揖客半是高陽徒穎上黃生纔二十  
酒酣自詫丹青殊含毫弄墨輒有意貌得衣冠古丈夫

有時亦寫韓幹馬五花色映官奚奴春江樓船日千里  
兩岸青山皆畫裏黃生無事但伸紙九老七賢無不似  
少年盤礴得如此生直須年名自起顧陸張吳亦人耳

題顧文康畫

明王世懋

國鈞挺奇秀翰史標都長玉樹著土中令人憶文康生  
平妙點染遺墨等琳琅茲圖發心賞遂令蹊逕忘落落  
兩長松居然具棟梁規模自承旨丘壑中所藏玄黃何  
用同襟期故相望為君什襲重持以比甘棠

寄章廷綸畫史

明邢侗

丹陽郭裏誰憐汝  
涕水亭邊最憶君  
此日謝安團扇上  
無人為畫敬亭雲

廣仁院畫壁

明湯顯祖

曾為蛾眉斬畫師  
千秋能此畫孩兒  
自慚遼佛無飛乳  
滿縣兒啼似不知

題畫贈蜀中尹使君惺麓

明董其昌

龍性繇來不易馴  
青天蜀道一歸人  
拈將海國秋山翠

得似峨眉雪後春

題畫贈張平仲充守

明董其昌

忽憶君家笠澤圖  
寒江密雪滿菰蒲  
於今身在齊青裏  
日對秦封五大夫

題畫 二首

明程嘉祿

清溪百疊遠含風  
樵路漁源望欲通  
一段鄉愁何處著  
傷春無奈夕陽中

客路無媒類轉蓬  
人間薄命是丹楓  
胭脂縱似桃花色

難挽春光二月紅

題畫

明李日華

霜落蒹葭水國寒  
浪花雲影上漁竿  
畫成未擬將人去  
茶熟香溫且自看

題謝孔昭雨中過沈孟淵所詩畫  
明王 肆

竹邊書屋柳邊舟  
白髮相逢酒一甌  
回首舊遊成遠夢  
滿林風雨不勝秋

題沈公濟雪中過沈孟淵所詩畫  
明王 肆

白髮交游二隱淪  
西莊一別幾經春  
雪中客有重來日  
不見當年冒雨人

為香山顧敬中題畫

明賀甫

芳草晴煙處處迷  
畫堂應在畫橋西  
花開記得尋君日  
一路香風送馬蹄

題雲林畫


明陳則

落花愁殺未歸人  
亂後思家夢更頻  
縱有溪頭茅屋在  
也應芳草閉深春

題畫

明僧智艁

數株老樹半無葉一箇茅亭終日空惟有鷺鷥常到此  
飛來飛去送殘紅



御定歷代題畫詩類卷一百二十